

PROT O C O L

dalla radunonza da vischnaunca politica
dils 06-12-2017, allas 20.00 uras en l'aula dalla casa da scola Trun

Il president communal Dumeni Tomaschett fa en num dalla suprastonza communal a tuts in cordial beinvegni alla radunonza da preventiv dalla vischnaunca da Trun. In special beinvegni fa el als anteriurs presidents comunals Walter Decurtins e Daniel Tuor ed alla presidenta da Trun Turissem, Renata Decurtins-Deplazes.

Perstgisas: Anna Thalmann, Mattias Cadruvi, Serafin Rensch, Manuel Reichenbach, Luregn Mathias Pfister

La radunonza ei vegnida convocada tenor art. 32 dalla constituziun communal ed ei consequentamein tenor art. 34 cumpetenta da concluder. La gliesta da tractandas ei stada publicada duas gadas el Fegl uffical dalla Surselva e secloma suandontamein:

1.	Avertura ed elecziun da 2 dumbravuschs
2.	Protocol dalla radunonza communal dils 05-12-2016
3.	Preventiv per igl onn 2018
4.	Fixaziun dil pei da taglia per igl onn 2018
5.	Varia

Tractanda 1 **Avertura ed elecziun da 2 dumbravuschs**

Sco dumbravuschs vegnan Gion Simeon e Baseli Tomaschett elegi.

Tractanda 2 **Approbaziun dil protocol dalla radunonza communal**
dils 05-12-2016

Il president communal Dumeni Tomaschett declara ch'il protocol seigi staus a disposiziun sin canzlia communal per investa. Supplementarmein eis el vegnius publicaus sin la pagina d'internet trun.ch. Cunquei che negin giavischa la prelecziun dil protocol sa vegnir passau tier la votaziun d'approbaziun.

Il protocol dalla radunonza communal dils 05-12-2016 vegn approbaus en votaziun unanima cun engraziament.

Tractanda 3 **Preventiv per igl onn 2018**

Il president communal informescha ch'il cussegl da vischnaunca hagi tractau il preventiv 2018. Cusseglieras e cussegliers proponan en votaziun unanima per mauns dalla radunonza communal l'approbaziun dil preventiv pigl onn 2018.

Il preventiv dil quen da gudogn e sperdita siara tier expensas da frs. 7'057'250.00 ed entradas da frs. 7'042'342.00 cun in pign deficit da frs. 14'908.00. Il gudogn avon amortisaziuns munta à frs. 156'392.00.

Il preventiv d'investiziuns siara tier expensas da frs. 2'719'000.00 ed entradas da frs. 1'195'000.00 cun in surpli d'investiziuns da frs. 1'524'000.00.

Las posiziuns principalas secumponan ord:

6150.5010.00	Via Principala	frs.	272'000.00
6150.5010.90	Illuminaziun publica	frs.	77'000.00
6150.5010.99	Sanaziun diversas vias communalas	frs.	200'000.00
6150.5030.00	Parcadi visavi Cuort Ligia Grischa	frs.	800'000.00
7201.5032.00	Sanaziun canalisaziun communalala	frs.	198'000.00
8205.5010.00	Project Via Munt	frs.	1'000'000.00

Suenter quellas explicaziuns surdat il president il plaid alla canzlista communalala per informaziuns detagliadas davart il preventiv 2018. Sandra Gautschi presenta las diversas spartas dil preventiv cun dar las explicaziuns necessarias.

Suenter la presentaziun dil quen d'investiziuns presenta il president communal il project da renovaziun ed engrondaziun dil parcadi visavi la Cuort Ligia Grischa. La via Principala vegn stuschada per biabein dus meters naven dalla Cuort engiuviars. Sindaquei ha la suprastonza communalala fatg patratgs davart sanar e renovar il parcadi da vischnaunca che sesanfla visavi. Igl inschignier ei vegnius incaricaus da luvrar ora in project cun integrar tualettas publicas e mologs enstagl dalla casa da rumians. Il parcadi vegn engrondius anoviars e survegn rodund dudisch parcadis dapli. La pleiv sogn Martin ha semussau interessada vid tualettas publicas en quei liug e vegn era a separticipar vid la finanziaziun. La suprastonza communalala ha decidiu da realisar il project e da preventivar ina summa da frs. 800'000.-persuenter.

Appartenent il quen da gudogn e sperdita damonda Flurin Maissen daco che las amortisaziuns pigl onn 2018 ein in bien ton pli bassas che quellas dils onns vargai. Il president communal declara che la vischnaunca hagi amortisau fetg bia ils davos onns, aschia era la scola ed il center communal, ed ei detti ils proxims onns paucas amortisaziuns. Vinavon sappi ins tenor il niev model da quen entscheiver ad amortisar pér cu in project ei serraus giu.

Ils presents approbeschan en votaziun unanima il preventiv dil quen da gudogn e sperdita ed il preventiv dil quen d'investiziun pigl onn 2018.

Tractanda 4 Fixaziun dil pei da taglia pigl onn 2018

Il president communal informescha che la suprastonza communalala, la cumissiun da gestiun ed il cussegl da vischnaunca proponien alla radunonza communalala da schar il pei da taglia per igl onn 2018 sin 105% dalla taglia cantunala semplia.

Cunquei che negin giavischa il plaid vegn passau tier la votaziun.

Il present fixesch en votaziun unanima il pei da taglia per igl onn 2018 sin 105% dalla taglia cantunala sempl.

Tractanda 5 Varia

Walter Decurtins dat ina investa el project da Munt d'avon rodond 60 onns. Anno 1951 ei stau igl onn da grondas lavinias, mo el cantun Grischun ha ei dau 54 morts. Sin fundament da quei schabetg ein confederaziun e cantun vegni allerta e han entschiet cun projects per lavineras. En la vischnaunca da Trun ha il president communal Vic Demund entschiet cul project da lavineras a Munt. Ei deva denton aunc l'Alp da Munt cun 78 dretgs. La calculaziun da cuosts mussava che la vischnaunca vess stuiu surpender frs. 122'079.- per baghegiar lavineras. Encunter quella calculaziun ha la suprastanza da lezzas uras fatg recuors. Lu ha ei giu num che la suprastanza vessi buca giu la cumpetenza da far il recuors e la fatschenta ei ida tier la radunonza da vischnaunca. Dils 120 presents han circa 60 stuiu bandunar la radunonza perquei ch'els eran pertuccai, pil pli persunas cun dretgs dall'alp. Sclauder quellas rodond 60 persunas ord la radunonza ha dau in recuors alla Regenza. Walter Decurtins seregorda che quei veva dividiu la vischnaunca en duas parts ed era stau fetg malemperneivel. El engrazia pigl engaschi dalla suprastanza communal e da tuts officials. Il project via Munt va vinavon bein ed ins vesa che quella via cuosta pauc alla vischnaunca.

Fridolin Decurtins vul prender il plaid per far in compliment alla gruppa da vischnaunca. La via denter ils cuolms da Boden e Criedi ei vegnida reparada enteifer paucs dis. La gruppa communal e siu menader hagian prestau grondiusa lavur. Vinavon fa Fridolin Decurtins attents ch'ei vegni tschintschau che la temperatura vegni adina pli aulta. Sch'el seigi si Criedi e miri encunter Punteglias vesa el ch'il glatscher vegn mintg'onn pli pigns. Cu el hagi viu ils magliacs neiv che vegnan produci giun Pustget hagi el studegiu sch'ei fussi buca pusseivel ch'inpèr voluntaris empruassan da far glatsch e cuvierer il glatscher. Cu il glatscher seigi naven seigi el naven per adina. El supplichescha la suprastanza da far patratgs en causa.

Giusep Decurtins engrazia per las cazzolas da via a Darvella su. Quellas fetschien propi clar ed els seigien fetg cuntents. El menziunescha il giavisch da montar duas ulteriuras cazzolas a Darvella sut. Lu engrazia Giusep Decurtins che la suprastanza communal e la radunonza communal han susteniu il project per la renovaziun dil parcadi visavi la Cuort Ligia Grischa. Il spustament dalla via ei tenor el fetg impurtonts pil baghetg.

Il president communal informescha davart il suandont :

La secunda etappa dalla Via Principala tras il vitg vegn finida sco previu. Ins ei cuntents cun l'execuziun, ei vesa ora bein e porta ina plivalur, oravontut la segirtad dils pedunzs vegn augmentada.

Il program dalla via da Munt ei buca tenius en diltut. Il responsabel speran da saver entscheiver cun las lavurs primavera intec pli baul. Denton, tut priu seigi la suprastanza cuntenza cugl andament dil project.

Ensemen cun la vischnaunca da Sumvitg e Nordic Surselva ha la vischnaunca entschiet in project per ennevar la loipa. A Pustget ein dus canuns da neiv vid producir neiv tecnica. La suprastanza vul porscher la loipa al turissem ed als indigens. Finamira ei era da puspei vender dapli pass da cuorsaliunga. Plinavon sto la loipa esser aviarta tons e tons dis per survegnir daners ord il fondo da « Loipen Schweiz ». Il project ei sin buna via, proxima fin d'jamna vegn la loipa ad esser aviarta.

Las duas punts sur il rein vegnan buca pli fatgas si. La suprastanza veva decidu avon plirs onns da far si las punts aschi ditg sco ei drova buca investiziuns vid talas. Ussa fuss ei stau aschi lunsch ch'ei vess duvrau investiziuns e la suprastanza ha desistiu da far quellas. Plinavon ha la suprastanza survegniu l'incarica da spargnar e sa buca pli surprendre ils cuosts annuals da varga frs. 6'000.- per tschentar las punts.

Dumeni Tomaschett admetta in cordial engraziament allas commembras ed als commembers dil cussegl da vischnaunca. Specialmein a tals che remettan lur uffeci engrazia el per lur engaschi en favur dalla vischnaunca. Vinavon engrazia il president communal alla cumissiun da gestiun. In special engraziament va ad Enrico Mazzetta. El ei staus duront 15 onns commember dalla cumissiun da gestiun. Ei seigi stau ina fetg emperneivla collaboraziun denter els ed el hagi schazegiau da saver telefonar da tut temps ad Enrico per menar discussiuns.

La suprastanza communal sto prender cumiau da dus geraus. Gerau Curdin Tuor ha sia situaziun da lavur ch'ei semidada. El lavura dapi l'entschatta digl onn a Cuera sco menader d'in uffeci cantunal. Tenor il president communal eis ei clar che la famiglia e la lavur han prioritad visavi in uffeci en vischnaunca. Dumeni Tomaschett declara ch'el deploreschi da piarder Curdin Tuor sco commember da suprastanza. Curdin Tuor era cudischaus cun leschas e reglaments, ed el veva in bien sentiment pil lungatg e saveva aschia denter auter curreger ils protocols.

Vinavon remetta il gerau Toni Pfister siu uffeci sin la fin da questa perioda d'uffeci. Toni Pfister ei staus avon la fusiun diesch onns gerau da Schlans e suenter duront sis onns gerau a Trun. Il president communal declara ch'el hagi adina admirau cun tgei premura che Toni ha menau siu uffeci da baghegiar. Toni Pfister ei s'engaschaus per las valurs da nossa vallada e ha mirau che nos mistergners survegnan lavur. Era sch'el ha giu bia malaveglia ha el empruau da perschader petents da megliurar projects el senn dallas valurs da nies vitg e da nossa vallada. Dumeni Tomaschett selegra d'astgar contactar Toni Pfister era el futur per dumandar siu cussegl.

Il president communal engrazia a tuttas convischinas ed a tuts convischins pil sustegn e la fidonza en la suprastanza communal.

Cun giavischar a tuts in bi temps d'Advent, bialas fiastas da Nadal e gia uss a tuttas convischinas e convischins tut bien per igl onn niev siara il president communal la radunonza.

Il president

La actuara